

四書地理考

四書地理攷卷六

東洞庭王塗

原名仲塗亮生著

國名類

顓臾

顓臾在今沂州府費縣○左傳杜注在泰山南武陽縣東北彙纂云今費縣西北八十里有顓臾城○釋地曰前漢志顓臾國在泰山郡蒙陰縣蒙山下費縣爲魯季氏邑則屬東海郡杜氏通典總收在沂州費縣下曰有蒙山有東蒙山有顓臾城余謂酈注沂水條云沂水從臨沂縣東流逕蒙山下又東南逕顓臾城又東流逕費縣故城南按其里程相去七十里耳故曰近

周南

周南在今鳳翔府岐山縣○詩地理攷云譜云周南者禹貢雍州岐山之陽地名今屬右扶風美陽縣朱氏云岐周在今鳳翔府岐山縣左傳周桓公注云周采地扶風雍縣北有周城史記自序太史公畱滯周南摯虞曰古之周南今之洛陽張晏曰洛陽而謂周南者自陝以東皆周南地也○括地志曰周公故城在岐山縣北九里○水經注江水篇云周書曰南國名也南氏有二臣力均勢敵競進爭權君弗能制南氏周分爲二南國也按韓嬰敘詩云其地在南郡南陽之閒呂氏春秋所謂禹自塗山巡省南土也是郡取名焉○蓋按秦南郡治江陵據韓詩之說則二南

不指周地也

召南

召南在今鳳翔府治鳳翔縣○詩地理攷釋文召地名在岐山之陽扶風雍縣南有召亭水經注雍水東逕召亭南世謂之樹亭川亭故召公之采邑京相璠曰亭在周城南五十里括地志邵公故城在岐周岐山縣西南十里故召公邑孔氏曰晉書地道記河東郡垣縣有邵亭今爲召州是也唐地理志絳州垣縣武德元年曰邵州今垣曲縣通典河南府王屋縣古召公之邑傅氏曰武王分陝之後徙於王屋郡縣志王屋縣本周時召武公之采邑○彙纂曰雍縣召亭今陝西鳳翔府境其山西平陽府垣曲之召原

則東遷後別受此采地也

微

微在今泰安府東平州○左傳莊二十八年築郕公穀皆作微杜注魯下邑彙纂云京相璠曰壽張西北三十里有故微鄉魯邑也今東平州西有微鄉故城○地理攷實曰壽張故城在東平州○陸氏嵩曰微子當封商之畿內一統志謂在今潞安府潞城縣縣東十五里有微子城其東南去朝歌不遠卽微子始封之地是也京相璠曰壽張東北三十里有故微城魯邑也則以微在今兗州府壽張縣矣按莊三十八年冬築微左氏微作郕路史因之遂謂微子始封岐之郕縣不知古本左傳本作麋不作郕且郕在

岐乃周地紂不得以封微子也徐文靖曰古器有微伯頊氏鼎又周微欒鼎銘曰王命微欒繼治九服用錫錫錫魯休是魯地必微子命爲宋公後有別封於微者春秋時有微虎爲魯大夫豈其後與路史又以謂微子後徙封聊城寰宇記亦云博州聊城縣有微子城博州今東昌府治春秋時屬齊旣遠于商之畿內又非魯地疑未可據

箕

箕在今遼州榆社縣○周氏柄中曰箕本商畿內之國呂新吾所謂山西遼州唐名箕州者卽箕子所封之故城在今榆社縣東南三十里○一統志箕子臺在西華縣儒學內相傳西華城本箕子所居唐改名箕城縣以此○又云

霍邱縣南開順鎮有箕子城

楚

楚都于丹陽在今宜昌府歸州武王遷郢在今荊州府江陵縣昭王又遷都在今襄陽府宜城縣○地理志楚地今之南郡江夏零陵桂陽武陵長沙及漢中汝南郡盡楚分也江陵故郢都西通巫巴東有雲夢之饒○國策蘇秦曰楚地西有黔中巫郡東有夏州海陽南有洞庭蒼梧北有汾涇郃陽地方五千里帶甲百萬車千乘騎萬匹粟支十年此霸王之資也○地理攷實曰杜注楚國今南郡江陵縣北紀南城疏云地理志南郡江陵縣故楚郢都楚文王自丹陽徙此世本云鬻熊居丹陽武王徙郢丹陽在南郡

枝江縣今江陵北有郢城史記稱文王徙都于郢彙纂云
今江陵縣屬荊州府紀南城在府北十里枝江縣亦屬荊
州府今按一統志丹陽城在歸州東七里熊繹始封此後
移枝江亦曰丹陽今歸州屬宜昌府昭十二年子革曰昔
我先王熊繹僻在荊山此據境內大山言之其實歸州去
荊州尙遠然以較之枝江在江之南則歸州差近矣○高
氏士奇曰通典云楚初都丹陽今秭歸東南故城是後移
枝江亦曰丹陽蓋諸侯徙都常襲前都之名如晉遷新田
仍謂之絳也又按楚遷郢後又徙羅人居枝江後漢志曰
枝江本羅國班固地理志楚始封在丹陽郡丹陽縣大謬
又按江陵有三城紀南城其一也其二曰故郢城漢志註

云楚別都又曰蓋楚未都紀南時常居之或卽若敖蚡冒之所營不可攷矣其三曰江陵城楚記郢都南而舊有二門一曰修門一曰龍門東面亦有二門按史記索隱楚都郢今在江陵北紀南城是平王更城郢今江陵東北故郢城是此誤也杜預歷注甚明始終一紀南城並無平王所城別是一城之說定四年遷于都今都城在宜城縣西南九十里所謂郢郢也故曰遷郢于都史記襄王二十一年秦白起拔我郢楚王東北保陳城謂之郢陳考烈王遷鉅陽或曰卽潁州西北之細陽城也二十二年又遷壽春命曰郢卽今壽州○按都謂之郢郢江陵謂之紀郢後人則通名耳班固地理志謂楚昭王自郢徙若尋復還郢說似

未確○大事表曰楚在春秋吞併諸國凡四十有二其西北至武關在今陝西商州東少習山下文十年傳子西爲商公卽商州之雒南縣也與秦分界其東南至昭關在今江南和州含山縣北二十里昭十七年吳楚戰於長岸卽和州南七十里之東梁山與太平府夾江相對是也與吳分界其北至河南之汝寧府南陽府汝州與周分界其南不越洞庭湖全有今湖北十府八州六十縣之地惟隨州爲隨國僅存又全有河南之汝寧南陽二府光州一州又闌入汝州之郟縣魯山縣河南府之嵩縣開封府之尉氏縣許州府之郛城縣及禹州與鄭接境四川夔州府之奉節縣與巴接境江西之南昌南康九江饒州與吳越錯壤

又全有江南之廬州鳳陽潁州三府及壽州和州之地江
寧府之六合太平府之蕪湖徐州府之碭山則與吳曰交
兵處也後廬壽之地多入於吳又曰余讀春秋至莊六年
楚文王滅申未嘗不廢書而歎也曰天下之勢盡在楚矣
申爲南陽天下之膂光武所發迹處是時齊桓未興楚橫
行南服由丹陽取荊州以立根基武王旋取羅都爲鄢郢
之地定襄陽以爲門戶至滅申遂北向以抗衡中夏然其
始要非一朝一夕之故也平王東遷卽切切焉戍申與甫
許豈獨內德申侯爲之遣戍亦防維固圉之計有不獲已
逮桓王莊王六七十年之久楚之侵擾日甚卒爲所滅自
後滅呂滅息滅鄧南陽汝寧之地悉爲楚有如河決魚爛

不可底止遂平步以窺周疆矣故楚出師則申息爲之先
驅守禦則申呂爲之藩蔽城濮之敗而子玉羞見申息之
老楚莊初立而申息之北門不啟子重欲取申呂以爲賞
田而巫臣謂晉鄭必至于漢申之係於楚豈細故哉故論
當日楚之形勢東拒齊則召陵之蹙爲咽喉之塞西拒晉
則少習武關通往來之道東而扞吳則鍾離居巢州來屹
爲重鎮迨州來失而入郢之禍始兆楚之植基固而形勢
便使周家猶繇延四百年不遂併于楚者桓文之力也

秦

秦都於雍在今鳳翔府治鳳翔縣○地理攷實曰非子爲
周孝王主馬汧渭間馬大蕃息封爲附庸而邑之秦今秦

州清水縣故秦城是也屬鞏昌府又鳳翔府隴州南三里
有秦城一統志云非子所封按此地本漢之汧縣襄公討
西戎有功平王賜以岐豐之地列爲諸侯寧公徙平陽今
郿縣西有平陽故城屬鳳翔府後魏改郿縣爲平陽德公
徙雍今鳳翔縣也獻公徙櫟陽今西安府臨潼縣也縣北
五十里有櫟陽城一云在西安府咸寧縣渭水之北孝公
徙咸陽今咸陽縣在西安府北五十里又曰意非子始食
邑于汧縣後復封之清水歟○地名攷畧曰史記大駱生
非子非子居犬邱又云秦嬴三傳至秦仲宣王時秦仲死
于戎宣王命其子莊公爲西垂大夫居其故西犬邱生襄
公世紀襄公二年徙居于汧或以爲卽漢之汧縣似誤也

史記不載襄公徙都兩漢地志亦不言汧縣嘗爲秦都又秦紀襄公葬西垂則仍居西垂明甚水經注汧水東逕汧縣故城北秦文公東獵汧田遂都其地易襄爲文於史稍合然史稱文公東獵汧渭之會卜居之而此邑卽今隴州反在汧源之上去渭甚遠猶未合也今寶雞縣東北有陳倉古城二城相連一爲秦文公所築其地在汧水之南渭水之北所謂汧渭之閒也漢志陳倉有羽陽宮秦武公所起武公文公之曾孫也辛氏三秦記秦武公都陳倉城卽是說矣汧渭與汧縣非一地然文公原未定居武公始居之武公寧公之子也○地理志曰其界自宏農故關以西京兆扶風馮翊北地上郡西河安定天水隴西南有巴蜀

廣漢犍爲武都西有金城武威張掖酒泉又西南有牂柯
越巂益州皆宜屬焉○國策蘇秦曰大王之國西有巴蜀
漢中之利北有胡貉代馬之用南有巫山黔中之限東有
殽函之固田肥美民殷富戰車萬乘奮擊百萬沃野千里
○大事表曰秦以西陲小國乘衰周之亂逐戎有岐山之
地是時兵力未盛西周故物未敢覬覦也值平桓懦弱延
及寧公武公德公以次蠶食盡收虢鄭遺地之在西岐者
垂及百年至穆公遂滅芮築壘爲王城以塞西來之路而
晉亦滅虢東西京隔絕由是據豐鎬故都判然爲敵與中
夏抗衡矣然滅滑而滑爲晉有不能越崤函以東一步滅
郟而郟爲楚有不能越武關以南一步其地有鳳翔府延

安府平涼府秦州西安府商州同州府乾州不越陝西一
省其同州與商州之地猶與晉楚錯壤○又曰秦與晉以
河爲界河以東爲晉河以西爲秦然秦當春秋時疆域褊
小非特隔于函關之外爲晉所限閼而不得出也攷史記
繆公立五年而晉獻滅虢虢是時新立而晉武獻已絕盛
滅虢而桃林已舉秦之門戶在晉肘腋中矣後晉文公初
伯攘白狄開西河魏得之爲西河上郡白翟之地爲今陝
西延安府東去山西黃河界四百五十里又惠公之世韓
之戰曰寇深矣若之何可見晉之幅員廣遠斗入陝西內
地不始于文公時此亦可爲秦晉疆域之一証也故終穆
公之世未嘗一日忘東向其援立惠公也實貪河外五城

之賂蓋欲圖虢之故地以爲東出之謀旣而韓之戰秦始
征晉河東未幾復屬於晉秦之不得志于晉可知也迨初
立文公秦欲納王而晉辭秦師獨下文公梟雄賴秦之力
而實陰忌之必不使勤王之舉得分其功晉之抑秦又可
知也至其年老智昏背晉與鄭盟已復襲鄭而穆公之始
終不忘東向其情蓋汲汲矣後與晉絕曰尋干戈少梁北
徵彭衙刳首迭有勝負然終不能越河以東一步蓋有桃
林以塞秦之門戶而河西之地復犬牙於秦之境內秦之
聲息晉無不知二百年秦人屏息而不敢出氣者以此故
也至孝公發憤渡洛魏人納地恐後而河西始悉爲秦有
矣吳起去西河而泣豈無故哉○又曰史記秦文公收地

至岐岐以東獻之周則豐鎬故京在岐之東
所以莊王與虢酒泉猶在同州府澄城縣而虢公敗犬戎
于渭汭猶在西周封內也方輿紀要曰秦右隴蜀左關坂
北有甘泉谷口南帶涇渭自晉滅虢斷桃林之隘而秦亦
築壘爲王城而故京遂判若異域周之遺地盡入于秦自
晉獻秦繆始也鄭詩譜謂秦襄公逐戎橫有西都八百里
之地者其說誠疏謬

康

康在今開封府禹州○釋地曰康畿內國名世本宋忠注
云封從畿內之康始封衛衛卽殷墟畿內之康不知所在
括地志故康城在許州陽翟縣西北三十五里陽翟今禹

州正周畿內地○惲氏敬曰康叔故城在潁川水經潁川東歷康城寰宇記陽翟縣康城少康故邑其諸康叔始封因其地歟○陸氏嵩曰寰宇記管叔廢黜封康叔爲懷侯故懷城在武陟縣西按王肅書注曰康國名在王都之內括地志曰故康城在許州陽翟縣西北二十五里蓋叔受采于康後徙封衛無封懷事實宇記之說不足信也

葛

葛在今歸德府寧陵縣○地理攷實云左傳杜注葛國在梁國寧陵縣東北彙纂云寧陵縣有葛城在汴河之南僖十七年齊桓公夫人葛嬴則葛國嬴姓今按葛城在寧陵北十五里故葛伯國也○周氏柄中曰漢書地理志陳留

郡寧陵縣注故葛伯國今葛鄉是唐隸宋州東距南亳六十里路史載有二葛以在寧陵者爲黃帝之後姬姓在河內修武者爲嬴姓卽左傳葛嬴之葛

昆夷

昆夷西戎○後漢書西羌傳武丁征西戎鬼方○竹書紀年周王季伐西落鬼戎○詩孔疏云氏羌之種漢世仍存其居在秦隴之西○漢書楊惲傳云安定山谷之間昆夷舊壤○地理志引詩周道郁夷師古曰言使臣乘馬行於此道也○塗按今鳳翔府隴州西五十里有故郁夷城書宅碣夷史記作郁夷此謂海碣之夷若韓詩郁夷當卽指昆夷

獯鬻

獯鬻北狄在周爲獫狁○毛傳云焦穫周地接於獫狁者
○爾雅云焦穫周地郭注今扶風池陽縣瓠中是也邵氏
正義云焦穫在雍州水經注沮水東注鄭渠渠首上承涇
水於中山西邸瓠口所謂瓠中也爾雅以爲周焦穫矣郡
縣志焦穫藪亦名瓠口卽所謂鄭白二渠是也晉書扶風
郡池陽縣今爲西安府三原縣焦穫澤在涇陽縣界○寰
宇記云在京兆府涇陽縣北外十數里亦名瓠口○史記
索隱引括地志曰夏桀無道湯放之鳴條三年而死其子
獯粥妻桀之衆妾避居北野隨畜移徙中國謂之匈奴其
言夏后苗裔或當然也○塗按史記黃帝本紀北逐葷粥

集解云匈奴傳曰唐虞以上有山戎獫狁葷粥居于北蠻
索隱云唐虞以上曰山戎亦曰葷粥夏曰淳維殷曰鬼方
周曰玁狁漢曰匈奴則獫狁之由來久矣豈待桀子爲之
耶

吳

吳始都梅里在今常州府無錫縣後遷姑蘇在今蘇州府
治○大事表云吳地記曰泰伯築城于梅里平墟周三里
二百步外郭周三百餘里漢爲無錫縣地通典云無錫縣
東南三十里有泰伯城地曰梅李鄉亦曰梅里村東五里
有皇山一名鴻山後遷於姑蘇○史記正義云自泰伯至
壽夢俱居梅里村在無錫縣東南六十里蘇州北五十里

諸樊始徙吳○吳越春秋閭閻使伍子胥相土嘗水造築大城周四十七里陸門水門各八○地名攷畧曰國語云命圭有命固曰吳伯不曰吳王則吳爲伯爵矣吳子乃春秋之書法恐非本爵○大事表曰武王定天下時泰伯之子孫已自立于勾吳武王因而封之時大江以南尙屬蠻夷之地分茅胙土所不及非若中原齊魯星羅棋置也故其地最廣遠春秋初尙服屬於楚自後寢強遂爲勍敵其所并吞之國大抵北出則擾廬壽西出則向鄱陽其地畧有江南全省而徐州屬宋廬屬楚安慶屬羣舒最後廬鳳亦入于吳而入郢之禍自此始太平府則與楚之和州對岸江寧府則與楚之六合接境其自浙之嘉興以及湖州

杭州則與越日相角逐之區也其自浙之嚴州以及江南之徽州江西之饒州則與楚日相窺伺之地也方輿家以江西全省亦爲吳地然于經傳無見第存其說云○又曰長江之險吳楚所共而楚居上游故長岸之戰司馬子魚曰我得上游何故不吉卒得其乘舟餘皇故吳楚交兵數十戰從水道則楚常勝而從陸則吳常勝楚以水師臨吳而吳常從東北以出楚之不意當其始叛楚也卽伐巢伐徐伐州來爭鬪于廬州鳳陽之間蓋欲自上而瞰下于重之克鳩茲也爲今太平之蕪湖而吳報之伐楚取駕則在廬之無爲矣楚靈之克朱方也爲今鎮江之丹徒此用水也而吳報之取棘櫟麻則出碭山與汝寧矣至昭二十三

年州來入吳州來爲今之壽春以淮爲固撤楚之藩籬而據其要害而入郢之禍兆矣當日舍舟于淮汭自豫章與楚夾漢淮汭卽州來豫章今鄱陽舍舟爲沉船破釜之舉由陸路爲出奇擣險之謀欲避所短而用所長懸師深入千里襲人蓋亦逆知楚瓦不仁而後敢出此使當日但斂兵持重勿與交鋒絕其餉道吳人輕銳師老欲歸正不必毀舟與塞城口之計止欲徐行驅之吳人遇險則必爭舟以濟爭則必亂半渡擊之可使隻輪不返故當日楚之失計在速戰而吳亦第僥倖而一得也夫地勢何常人能用之則勝厥後越兼吳之地而卒覆於楚豈非楚常得地勢之便哉

徂莒

徂莒疑二國名○焦氏循曰依鄭君箋說徂爲國名遏徂之說不可攷遏莒之事見於韓非子云文王侵孟克莒是已

四書地理攷卷六終

四書地理攷

卷六

主

四書地理攷卷七

東洞庭王塗

原名仲塗

亮生著

國名類

燕

北燕國於薊在今順天府治大興縣南燕在今衛輝府治
汲縣○杜注南燕國今東郡燕縣○大事表曰今衛輝府
東南三十五里廢胙城縣是○說文鄭周封黃帝之後于
鄭也上谷有鄭縣○段氏玉裁曰樂記武王克殷未及下
車而封黃帝之後于薊陸德明曰今涿郡薊縣是也卽燕
國之都也孔安國司馬遷及鄭皆云燕召公與周同姓案
黃帝姓姬君奭蓋其後也或黃帝之後封薊者滅絕而更

封燕召公乎疑不能明也而皇甫謐以召公爲文王之庶子記傳更無所出左傳富辰言文王之昭亦無燕王哉案地理志曰廣揚國薊燕召公所封則班意謂黃帝之後卽召公也而周本紀以封堯後于薊封召公于燕並言張守節疑薊爲燕所并未知其審○括地志曰燕山幽州漁陽縣東南六十里國都城記云周武王封召公奭于燕地在燕山之野故國取名焉○地理志東有漁陽右北平遼西遼東西有上谷代郡雁門南得涿郡之易容城范陽北新城故安涿縣良鄉新昌及勃海之安次皆燕分也樂浪元菟亦宜屬焉○國策蘇秦曰燕東有朝鮮遼東北有林胡樓煩西有雲中九原南有呼沱易水地方二千里又曰秦

之攻燕也踰雲中九原過代上谷彌地踵道數千里雖得燕城秦計固不能守也秦之不能害燕亦明矣今趙之攻燕也發號出令不至十日而數十萬之衆軍于東垣矣度呼淹涉易水不至四五日而距國都矣故曰秦之攻燕也戰于千里之外趙之攻燕也戰于百里之內

鄒

鄒在今兗州府鄒縣○地理攷實曰左傳杜注云邾今魯國鄒縣是也譜云文公徙于繹戴侗六書故曰邾鄒同聲實一地春秋時邾用夷故謂之邾婁合邾婁之音爲鄒故邾改名鄒又案輿地廣記淄州鄒平縣古鄒國兗州鄒縣邾文公所遷邑按此本是二國鄒平屬濟南府水經漯水

逕鄒平縣故城北注云有鄒侯國舜後姚姓非邾國明矣
鄒平距鄒縣數百里地非相接豈能越遠而遷都魯文公
十三年邾文公遷于繹蓋自其國都遷于繹山之下必非
自鄒平來徙也○施氏彥士曰鄒國曹姓大紀云武王封
祝融安期之裔挾于邾後穆公改爲鄒故城在今兗州府
鄒縣東南二十六里鄒嶧山下三遷志云鄒城北二十五
里馬鞍山下有付村卽孟子所生地前臨白馬河孟母泉
出焉今改爲馬鞍泉又鄒城南崇教門外左側有中庸精
舍世傳卽孟母三遷之地○焦氏循曰左穀作邾公羊作
邾婁邾婁之合聲爲鄒國語孟子作鄒趙岐曰鄒本春秋
邾子之國至孟子時改曰鄒此未知其始本名鄒也周氏

廣業曰鄒有二皆顓帝後所封國一早著於幽王之世史
伯謂鄭桓公曰當成周者東有齊魯曹宋滕薛鄒莒又曰
黎爲高辛氏火正命曰祝融其後以姓存者姁姓鄒郇偃
陽曹姓鄒莒皆爲采衛此鄒人春秋不復見惟晏子載景
公爲鄒之長塗晏子諫而息疑爲齊所滅漢志濟南郡有
鄒平梁鄒二縣水經注謂鄒平古侯國舜後姚姓蓋卽今
濟南府鄒平縣地也其一卽邾大戴記顓頊子老童產重
黎及吳回吳回產陸終陸終六子其五曰安是爲曹姓曹
姓者邾氏也俠以下至儀父始見春秋十四世文公遷於
繹今兗州府鄒縣北繹山是也終春秋不聞有鄒至戰國
更無邾名故趙氏以爲至孟子時改也○塗按國語所稱

之鄒當卽是邾國語以爲重黎之後大戴記以爲吳同之後則傳聞之異也邾平之邾則水經注言舜後姚姓別一國也

邠

邠在今邠州三水縣○括地志云幽州三水縣西十里有幽原周先公劉所都之地也幽城在此原上○地里攷實云邠州在西安府西北三百五十里州北六十里三水縣有幽城有幽亭有幽谷○寰宇記云邠州三水縣梅邑故城在縣東二十五里卽漢梅邑屬右扶風有邠鄉應劭注云左傳畢原酆郇文之昭也郇侯賈伯伐晉是也又云古邠城在縣西南三十里有古邠城在隴川水西蓋古公劉

之邑卽此城也國都城記邠國者后稷之曾孫曰公劉始都焉邠國名也與古郇邑城相去約五十餘里漢志注云邠鄉是也

管

管在今開封府鄭州○杜注管國在滎陽京縣東北○彙纂云隋置管城縣今開封府鄭州治廢管城是也○括地志云鄭州管城縣外城古管國名也○地理志河南郡中牟下云圃田澤在西豫州藪有管叔邑○陸氏嵩曰宣十二年晉師救鄭楚子次於管以待之晉師在敖鄆之間陸德明云管城管叔所封也杜預云敖鄆二山在滎陽西北晉載記石虔襲破閭振吳仲于激水振仲退保管城則管

城當在潞水之北又郡國志曰河南中牟縣有管城

戎狄

戎在今曹州府曹縣東南四十里○隱公二年春會戎于
潛秋及戎盟于唐○說文鄒北方長狄國也在夏爲防風
氏在殷爲汪芒氏春秋傳曰鄒瞞侵齊○段氏曰魯語仲
尼曰昔禹致羣神于會稽山防風氏後至禹殺而戮之其
骨節專車防風汪芒氏之君也守封嶠之山者爲漆姓在
虞夏商爲汪芒氏在周爲長翟按國語本作在虞夏爲防
風氏在商爲汪芒氏爲說苑說文所本今國語及史記誤
奪數字耳韋注云防風汪芒氏國名汪芒長翟氏國名此
依孔子防風汪芒氏之君而言之今訛爲汪芒之君名則

不可解矣韋注云封嶠二山在今吳郡永安縣周世其國
北遷爲長狄也永安今浙江湖州府武康縣顧氏祖禹曰
鄭瞞在山東濟南府北境或云今青州府高苑縣有廢臨
濟故城古狄邑卽長狄所居○地理攷實曰山戎無終爲
一今直隸永平府地北戎當在河北莊二十八年大戎小
戎在太原交城成元年之茅戎在解州平陸北戎蓋此等
戎耳又允姓之戎在瓜州今肅州西五百餘里驪戎在臨
潼縣東二十四里犬戎在今蒲州府對河爲陝西華陰渭
水入河處爲渭汭臯落氏赤狄別種在太原府樂平縣楊
拒泉臯伊洛之戎在洛陽縣盧氏縣鞏縣之地陸渾戎在
河南府嵩縣廂咎如赤狄別種姜戎居晉南鄙白狄在西

河之西今延安府地潞氏赤狄別種今潞安府潞城縣甲
氏留吁赤狄別種在潞城縣徐吾氏茅戎之別○塗按戎
狄之類不一與魯交兵者惟楚邱之戎及潞氏之狄與邲
瞞耳○大事表曰四裔之中戎種最雜亂難稽或三名而
爲一族或一種而隨地立名隨時易號綜而計之其別有
七一戎州己氏之戎二北戎山戎無終三允姓之戎陸渾
之戎小戎姜戎陰戎九州戎四揚拒泉皐伊雒之戎五蠻
氏茅戎戎蠻六犬戎七蠻戎如文十六年戎伐楚西南則
爲楚山間民非有名號不列于戎之數又曰春秋之世有
赤狄白狄長狄長狄兄弟三人無種類而赤狄白狄種類
最繁案經傳所見赤狄之種有六曰東山皐落氏曰腐咎

如曰潞氏曰甲氏曰留吁曰鐸辰白狄之種有三曰鮮虞曰肥曰鼓然以予攷之閔僖之世狄尤橫其時止稱狄未有赤白之號蓋當時之單以狄舉者皆赤狄也赤狄最强能以威力役其種類白狄故居河西其別種在中國者赤狄能役屬之而長狄尤其酋豪中之魁異者合諸部爲一力大勢盛故能以兵威伐邢入衛滅溫伐周又能仗義執言救齊伐衛以齊晉之強莫之能抗也其疆域自晉蒲屈以東東與齊魯衛爲界蓋自平陽潞安以及山東之境雜居山谷縣地千里故當日邢衛宋魯齊晉鄭諸國胥被其患迨魯僖公之三十二年而狄始亂明年伐晉而白狄子見獲蓋其種類自相攜貳各分部曲如匈奴之分五單于

勢分力弱自是而赤狄白狄紛然見經而狄始不競矣論者謂長狄赤狄之各爲一國非也蓋其初皆屬于赤狄後稍稍離異始以名見于春秋文宣之世威令不行四出侵伐屢見挫衄經書晉侯敗狄于箕卻缺獲白狄子叔孫得臣敗狄于鹹獲長狄僑如皆狄之將佐後僑如之弟焚如與潞俱滅則狄之死國難者春秋賤之故不書綜而計之莊公三十二年而狄伐邢暴橫中國更三十有四年而狄有亂赤狄白狄始分又三十有五年而赤狄潞氏滅于晉又六十有五年而晉滅肥又十年而晉滅鼓白狄止存鮮虞首尾百四十有四年之間盛衰強弱之故豈不較然也哉晉里克之避狄也曰懼之而已無速衆狄則當狄之合

狄之所以盛也卻成子之求成于狄也衆狄疾赤狄之役
遂求成于晉則當狄之分狄之所以衰也○塗按赤狄白
狄俱隗姓則謂其本爲一國可也長狄號畎邠漆姓則別
爲一國可知

舒

舒在今廬州府廬江縣○彙纂云今廬州府舒城廬江二
縣之境皆羣舒地○樊氏廷簡曰劉耕南曰荆以東卽爲
舒地僖公三年徐人取舒杜注舒國今廬江舒縣彙纂云
今廬江縣西舒縣故城是林堯叟曰舒楚之同類徐附齊
故爲齊取楚之與國案此懲舒之事蓋舒假姓子爵同宗
而異國者謂之羣舒在楚成王時舒固楚屬國也自楚穆

王以後羣舒屢嘗叛楚魯頌荊舒是懲毛傳舒無明詰鄭箋指爲羣舒孔疏羣舒楚之與國故連言荊舒蓋因鄭爲說也公羊傳其言取之何易也何休注據國言滅徐彥疏卽莊十年齊師滅譚十三年齊人滅遂之屬是也趙鵬飛曰齊桓自莊二十六年伐徐意徐遂服于齊徐服于齊則取舒之謀齊謀也舒隸於廬而迫近楚齊之爲謀襲其不備而取之奪楚援也其後楚疾于徐而兩伐之齊桓公爲合八國之君子匡而使大夫救徐則楚之伐蓋憤徐滅其與國而桓公救之亦以其有取舒之功李廉曰徐始見經而得書人始滅國而得書取是必末滅之辭路史云少昊後偃姓舒國徐人取舒杜云廬江舒縣今廬之舒城也一

作郢據此舒自爲徐所取其國已滅與羣舒不同而當以
徐人取舒爲荆舒是懲之確證文十二年羣舒叛楚夏子
孔執舒子平及宗遂圖巢杜註羣舒偃姓舒庸舒鳩之屬
今廬江南有舒城舒城西南有龍舒平舒君名宗巢二國
羣舒之屬正義曰世本偃姓舒庸舒蓼舒鳩舒龍舒鮑舒
龔以其非一故言屬以包之王應麟詩地理攷春秋有舒
舒鳩舒庸謂之羣舒皆偃姓皐陶後孔氏曰又有龍舒據
此舒與羣舒其姓同其地相近因舒而兼該羣舒則可卽
以舒爲羣舒則不可也○塗按宣八年楚滅舒蓼杜註舒
蓼二國名孔疏曰二國轉寫之誤當云一國是也孔氏又
云卽文五年所滅之蓼時復故而楚更滅之非也蓼在安

豐羣舒在廬江不得相混成十七年楚滅舒庸杜註舒庸東夷國人杜旣以舒庸當羣舒之一則謂東夷國人者謬也襄二十五年楚滅舒鳩定二年吳子使舒鳩氏誘楚人曰以師臨我楚師于豫羣吳敗之杜註舒鳩楚屬國蓋楚雖滅之猶存其祀故爲屬國也杜氏但以漢舒縣爲古舒國餘羣舒惟巢國有注云廬江六縣東有居巢城其舒蓼舒庸舒鳩及宗四國皆不能明其處但云廬江南有舒城及龍舒城約畧四國所居在此兩城間而已高氏士奇曰龍舒故城在廬江縣東一百二十里

奄

奄在今兗州府曲阜縣○地理攷實曰曲阜舊城卽古奄

國或言奄城在縣東二里○說文云郕周公所誅國在魯
○段氏玉裁曰爾雅弇蓋也故商奄亦呼商蓋墨子曰周
公旦非關叔辭三公東處于商蓋韓非子曰周公旦將攻
商蓋辛公甲曰不如服衆小以劫大乃攻九夷而商蓋服
矣商蓋卽商奄也奄在淮北近魯鄭注書序云奄乃淮夷
之北注多方云奄在淮夷旁祝鮀云因商奄之民封魯者
杜云或迸散在魯是也○樊氏廷簡曰周伐奄凡三孟子
所謂伐奄者蓋第一舉也林之奇曰奄卽淮夷之一種總
言則謂之淮夷如春秋赤狄之有潞氏甲氏也書序武王
崩三監及淮夷叛周公相成王將黜殷作大誥傳云三監
管蔡商淮夷徐奄之屬皆叛周多士篇王曰昔朕來自奄

傳謂先誅三監後伐奄與淮夷正義曰金縢之篇說周公東征言居東二年罪人始得則昔來從奄者謂攝政三年時也於是王不親行而言我來自奄者周公以王命誅四國周公師還亦是王來還也此時奄與三監叛周公作大誥以征之是周第二次伐奄也書序成王東伐淮夷遂踐奄傳云成王自政淮夷叛國又叛王親征之遂滅奄而徙之多方曰王來自奄至于宗周傳云周公歸政之明年淮夷奄又叛魯征淮夷作費誓王親征奄滅其國五月還至鎬京是周第三次伐奄也皆與相武王伐奄無涉孟子言伐奄以助紂爲虐也三年者趙註云武王伐紂至孟津還歸二年復伐前後三年也

鄭

鄭都于新鄭在今開封府新鄭縣○地理攷實曰杜注鄭在滎陽宛陵縣西南譜云宣王封弟友于鄭今京兆鄭縣是也彙纂云朱子詩傳鄭本在西都畿內咸林之地武公得號鄆之地乃徙其封而施舊號於新邑是爲新鄭縣東北有宛陵城卽古宛陵縣也今按京兆鄭縣今陝西同州府華州治是也咸林亦作械林○括地志鄭故城在華州鄭縣西北三里○寰宇記黃帝都於有熊卽其地又爲祝融之墟於周爲鄭武公之國按國語史伯曰若前莘後河右洛左濟主茅魏而食溱洧修典刑以守之惟是可以稍固又曰唯謝邠之間言在謝之北邠之南謝在南陽邠在

雒陽○高氏士奇曰竹書紀年晉文侯二年同王子多父伐鄆克之乃居鄭父之邱名之曰鄭八年王錫司徒鄭伯多父命十四年鄭人滅虢十六年鄭遷于溱洧此鄭國東徙之說也班固曰今河南之新鄭及滎陽成臯潁川之崇高陽城皆鄭分也鄭爲韓所滅韓哀侯自平陽徙都之又按史伯曰前莘後河右洛左濟惟今鄭州形勢足以當之郡國志州東有莘城此前莘之說也若新鄭在鄭州南四十里莘在後矣或者初遷時居此卽竹書所謂鄭父之邱歟又按公羊傳曰古者鄭國處于留而史伯所言十邑中無留或者其卽畎畝留後爲陳併故曰陳留又有南鄭今之漢中桓公死幽王之難其民南奔居于褒斜之中故號

南鄭此華州鄭縣民也與新鄭無領○大事表曰鄭桓公武公曰幽平之世以詐取虢檜之地其地當中國要害四面皆強國故雖以鄭莊之奸雄無能爲狡焉啓疆之計終春秋二百四十年僅再滅許肆其吞噬而已而虎牢入晉雋櫟邾入楚鄭之封疆亦蝕于晉楚焉其地有開封府之祥符蘭陽中牟陽武洧川鄆陵尉氏鄭州河陰汜水滎陽滎澤兼涉杞縣與楚接界陳留與陳接界封邱與衛接界許州府爲所奪許國地禹州爲櫟都汝州之魯山邾縣本楚以餌鄭旋復爲楚奪又闕入衛輝府之延津縣河南府之登封縣鞏縣偃師縣陳州府之扶溝縣懷慶府之武陟縣歸德府之睢州其闕入直隸大名府之長垣縣者爲祭

仲邑東明縣有武父地僅彈丸黑子而已○又曰齊晉迭
伯與楚爭鄭者二百餘年是時鄭西有虎牢之險北有延
津之固南據汝潁之地恃其險阻左支右吾蓋滎陽成皐
自古戰爭地勢然也至子產之世虎牢已先屬晉犇櫟邾
已先屬楚鄭之地險盡失徒善其區區之詞命以大義折
服晉楚蓋亦人謀之善匪關地勢矣然自三家分晉而韓
得成皐卒以滅鄭則鄭之虎牢豈非得之以興失之以亡
者哉

三苗

三苗在今湖廣武昌岳州二府江西九江府地○釋地曰
張守節據吳起言昔三苗氏左洞庭右彭蠡洞庭在岳州

巴陵縣西南一里南與青草湖連彭蠡在江州潯陽縣東南五十二里以天子在北故洞庭在西爲左彭蠡在東爲右今江州鄂州岳州三苗之地也杜氏通典以潭州岳州衡州皆古三苗國地○江氏承曰張守節所指太廣胡氏渭謂三苗今爲岳州府地也舜竄其君及民于三危之地○山海經三苗國在赤水東其爲人和隨注云昔堯以天下讓舜三苗之君非之帝殺之有苗之民叛入南海爲三苗國○淮南子墜形訓有三苗民高誘注云三苗蓋謂帝鴻之裔子渾敦少昊氏之裔子窮奇緡雲氏之裔子饕餮三族之苗裔亦謂之三苗又云三苗國民在豫章之彭蠡○塗按三苗在四凶中而高氏以爲三族之苗裔不可從

有庫

有庫在今趙州之隆平縣○周氏柄中曰舊說有庫在今
永州府零陵縣閭百詩曰據經文欲常常而見之云云豈
有兄居蒲坂弟居零陵陸阻大行水絕洞庭較諸驩兜放
處尤遠千里之理乎按路史謂九域圖經樂史寰宇記並
以象城爲象所封象城屬鉅鹿與帝都密邇是也○括地
志鼻亭神在營道縣北六十里故老傳言舜葬九疑象來
至此後人立祠名爲鼻亭神○塗按後漢書東平王蒼傳
曰昔象封有鼻註云有鼻國名在今永州營道縣北此道
州鼻亭之說所由來也羅泌路史以有鼻與象城並列似
兩地皆其封者不知其地去蒲坂絕遠決無源源而來之

理說者又謂中土無地可封故封之遠裔此亦無稽之言
路史寰宇記以爲鉅鹿象城者得之攷趙州志曰隆平縣
卽禹貢所謂大陸旣作之地戰國時趙武靈王嘗遊於此
西漢志廣阿象氏二縣東漢省後魏復置廣阿縣孝昌二
年改置殷州治於此隋初改爲象城縣後改爲大陸縣唐
武德初仍爲象城縣天寶元年更爲昭慶縣宋太宗下并
汾因觀此地四無山阜曠然平地始改名隆平按庠字從
卑得聲廣韻下也玉篇短也國語陂唐汚庠以鍾其美周
禮其民豐肉而庠此地旣無山阜則與有庠之名亦合趙
州志又云寧晉縣卽舜典納于大麓處今按寧晉與隆平
接壤則此地實爲舜舊遊之處必見其平曠肥美而以封

象亦親愛之意也隆平亭晉在秦漢間俱屬鉅鹿郡麓與鹿古字通鉅者大也應邵曰鹿林之大者也臣瓚曰山足曰鹿鉅鹿因大麓得名自庫與鼻音近而訛後遂以鼻亭當有庫云

虞

虞國于夏墟在今解州平陸縣○史記武王求虞仲之後已君吳乃封周章弟虞仲于周之北故夏墟又曰予讀春秋古文乃知中國之虞與荆蠻勾吳兄弟也○杜注在河東大陽縣○大事表曰唐改大陽曰平陸今平陸縣東北四十五里有古虞城又云今大陽廢縣在平陸縣東五十里又東北三十里爲故下陽城○釋地曰裴駢引賈逵註

云虞在晉南號在虞南按爾時爲晉獻公十九年正都于絳絳在太平縣之南絳州之北土人至今呼故晉城杜注莊二十六年士蔿城絳註絳今平陽絳邑縣成六年不如新田又註新田今平陽絳邑縣是竟爲一地也果爲一地不應將遷新田之時名獻公所都曰故絳矣新田括地志在絳州曲沃縣南二里今土人呼王官城距故晉城五十里又攷明一統志平陽府古蹟載晉城在太平縣南二十五里晉士蔿所築獻公都焉○一統志吳山在安邑縣東南三十二里跨夏縣平陸縣界一名虞山一名吳坂實字記太行山有路名曰虞坂周武王封仲雍之後虞仲于夏墟因虞爲稱謂之虞坂晉假道于虞以伐虢卽此路也州

志石崖峻險亦中條支阜也今爲孔道○高氏士奇曰周書王會解曰天子立于堂上堂下之右唐公虞公南面立焉又史記解曰君娛于樂臣爭于權民盡于利有虞氏以亡虞仲得封夏墟蓋在古虞旣亡之後也實字記曰平陸縣西六十里有虞芮所讓之開原東西七里南北十三里此虞周初尙存

虢

虢都于上陽在今陝州○地理攷實曰杜注虢叔東虢君也今滎陽縣彙纂云此爲東虢國虢叔所封後并于鄭有故城在今汜水縣東十里近滎陽界今按虢仲虢叔爲王季子姓氏書曰仲曰西虢後遷上陽爲南虢晉滅之叔曰

東虢平王奪其地與鄭據此則虢叔國在東也左傳疏云
虢叔封西虢仲封東而此云虢叔東虢君者言所滅之君
字叔此孔氏從賈逵說也僖五年疏云賈逵云虢仲封東
虢制是也虢叔封西虢虢公是也賈之言亦無明證不可
審知據此則賈說亦非定說矣又云左傳鄭人以王師虢
師伐衛杜注西虢國也宏農陝縣東南有虢城葉謨云今
河南陝州卽陝縣也今按虢叔初封于虢爲西虢故城在
陝西鳳翔府寶雞縣東六十里後改封于陝今陝州爲直
隸州○方輿紀要曰在陝州者曰北虢在開封府滎陽者
曰東虢在鳳翔府寶雞縣二十里虢國城曰西虢○晉書
地道記曰雍縣秦德公所居西虢地也○瑤按西虢卽

陝州或曰南虢或曰北虢其實一也○何氏焯曰左傳注陝縣東南有虢城卽是西虢國乃虢仲所封大陽之下陽城蓋其別都河東宏農地勢相屬非兩國也繁陽虢叔所封在陝州之南故當年得東虢之名若右扶風之虢與周室二虢無預孟堅謂西虢在雍州姑臧所疑耳○一統志上陽城在陝州東南爲虢國左傳僖二年晉假道於虞以伐虢五年圍上陽注云上陽虢國都在宏農陝縣東南漢志云宏農郡陝故虢國北虢在大陽東虢在滎陽西虢在雍州水經注陝縣東城卽虢邑之上陽寔字記虢城在磔石縣西三十六里鄭樵通志虢都上陽今虢州虢略虢仲之封也謂之西虢而虢叔之封在鳳翔縣謂之南虢復有

一號居于滎陽謂之東號通鑑地理通釋號姬姓西號號
叔之後陝州陝縣上陽故城在縣東兼號州爲南境按賈
逵馬融以上陽爲號叔國酈道元又云號仲所都賈馬指
上陽爲西號班志則謂北號道元又謂南號迄無定論今
以通志通釋爲正云○大事表曰西號舊都在鳳翔府寶
雞縣東五十里後隨平王東遷更封于上陽其支庶留于
故都者爲小號莊公七年爲秦所滅○趙氏一清曰陝與
大陽夾河對岸南號卽北號故有上陽下陽之分亦有南
號北之稱矣

有莘

有莘在今開封府陳留縣○釋地曰元和郡縣志故莘城

在汴州陳留縣東北三十五里古莘國地計其去湯都南
毫不過四百里故湯使可三往聘若太姒所產之莘國則
在今西安府郃陽縣南二十里道遙遠矣○大事表曰桓
十六年使盜待諸莘杜注衛地今東昌府莘縣有莘亭故
城成二年師從齊師于莘卽此杜注以爲齊地者非是又
莊十年荆敗蔡師于莘杜注蔡地在今河南汝寧府汝陽
縣境又莊三十二年有神降于莘杜注虢地高氏地名攷
以爲今陝州硤石鎮西十五里莘原是也惟僖十八年晉
侯登有莘之墟杜注故國名元和志汴州東北陳留縣東
北二十五里有故莘城爲古莘國地又曹州濟陰縣南三
十里有莘仲故城爲伊尹所耕地濟陰今之曹縣也○括

地志曰古藝國城在同州河西縣南二十里世本云莘國
姒姓夏禹之後卽散宜生等求有莘美女獻紂者○樊氏
廷枚曰今河南開封府陳留縣有莘城山東曹州府曹縣
有莘仲集其地接二縣莘字又作藝列女傳湯妃有莘是
也○塗按有莘與莘不同孟子明言有莘之野僖十八年
獨言有莘之墟當爲一地從在陳留之說爲是○一統志
莘城在陳留縣東北

任

任在今濟寧州○釋地云任國名太皞之後風姓今濟寧
州東任城廢縣是去古鄒城僅百二三十里宜屋廬子明
日卽可往問○施氏彥士曰按洪稚存地志濟寧州東至

鄒縣界泗河四十里縣志泗河至縣治三十五里又東南二十六里嶧山之陽卽故鄒國使屋廬子之今鄒治南孟子故宅不過七十五里卽之故鄒國亦僅百里釋地似微誤

越

越都于會稽在今紹興府山陰縣○史記正義引吳越春秋云少康恐禹迹宗廟祭祀之絕乃封其庶子于越號曰無餘又曰輿地志云越侯傳國三十餘葉歷殷至周敬王時有越侯夫譚子曰允常拓土始大稱王春秋貶爲子號爲於越○地理攷實曰外傳芊姓歸越是越本楚之別封或非夏后之後○塗按路史曰越芊姓古南越盟會圖疏

曰南越廣州按南海桂林象郡皆是非姒姓之越東南二
越諸儒皆一之疎矣觀羅氏此言則國語指南越言也○
地名攷畧曰禹葬會稽蓋陵墓所在故分封支庶以守之
也范蠡曰我先君固周室之不成子也按周禮諸子之國
封疆方二百里越不能成子爵言其小也自夫餘以下二
十餘世至允常宣公八年楚人盟吳越名始見于春秋昭
五年會楚伐吳事始見于經當是時越之封城南至于句
無北至于禦兒東至于鄞西至于姑蔑蓋跨有錢唐之東
西矣又按句踐初歸越吳封以百里之地東至炭瀆西至
周宗南造于山北薄于海蓋不得有浙西之地也後又增
其封東至于句甬西至于檣李南至于姑末北至于平原

縱橫八百餘里則視允常之故封又加廣矣吳敗檣李時
檣李地尙屬吳在石門縣東二十里有石城鎮吳人壘石
爲門以距越卽其處也○大事表曰越自少康初封厯商
至周初千有餘歲武王因其舊而不改延及春秋之季又
五六百年至允常始與吳相戰伐見于經傳其封域極隘
國語與越絕書所載不同其北向所至曰禦兒曰平原皆
在今嘉興一府之地其西南至于姑蔑則在今衢州府龍
游縣然昔人稱餘汗爲越地淮南王安謂越人欲爲變必
先田餘汗界中通典亦謂爲越之餘則自江西廣信至饒
州皆越之西界國語所云姑蔑蓋未盡矣又案越大夫胥
犴勞王于豫章之內實在今鄱陽湖蓋鄱陽爲楚餘汗爲

越分峙湖之兩岸楚越相結歸王乘舟應在于此若北出則千餘里皆吳地越方仇吳豈能以孤軍徑行其地而與楚會耶其地全有浙之紹興寧波金華衢溫台處七府之地其嘉杭湖三府則與吳分界由衢歷江西廣信府至饒之餘干縣則與楚分界又曰史記越滅吳而不能正江淮以北故楚得東侵廣地至泗上與魯泗東之地方百里張守節正義曰泗上謂廣陵徐泗等州則今揚淮以及徐州泗州之地皆棄與楚余嘗著論謂越棄地利不守延至五世爲楚所滅幸矣後閱吳越春秋有云越旣平吳北渡淮會齊晉諸侯徙都于琅琊水經注亦云琅琊越句踐之故都也越絕書勾踐平吳霸關東徙琅琊起觀臺周七里以

望東海諸書所載較若畫一史記所云越滅吳棄江淮以
北徵之左傳他事皆不合按哀公二十二年越滅吳二十
七年越使后庸來正邾魯之界公與之盟于平陽後哀公
嘗欲以越伐魯而去季氏公又嘗如越曾子居武城有越
寇見于孟子武城在今沂州府費縣西南九十里與沂州
近夫越既滅吳與齊晉諸侯會于徐州天子致胙方欲正
邾魯山東之侵界豈其棄江淮不事且既棄之以予楚矣
如后庸使命之往來及出兵侵魯豈反假道于楚耶又范
蠡既雪會稽之恥變姓名寓于陶陶爲今曹州府曹縣蓋
先時吳屢伐齊魯沂曹之地久爲吳之錯壤越滅吳因有
其地則其遷都琅瑯蓋盡吳之境與北方諸侯爭衡豈有

反棄江淮之地以資勦敵之楚耶且史記言自勾踐以後
五世至無疆中間嘗欲伐齊齊與吳接境若勾踐棄江淮
以北則其後世必不能拓有吳境與齊遠不相接無緣有
伐齊之事則史記之自相矛盾更較然矣

貉

貉東北狄○說文云貉北方豸種孔子曰貉之爲言惡也
又羗字注云東方貉从豸

四書地理攷卷八

東洞庭王塗

原名仲塗

山名類

泰山

泰山在今泰安府泰安縣北五里○說文云岱大山也○段氏玉裁曰域中最大之山故曰大山○白虎通曰岱宗者何言萬物更相代於東方也○風俗通曰岱始也宗長也萬物之始陰陽交代故爲五嶽之長○塗按禹貢海岱惟青州鄭注東自海西至岱孔傳東北據海西南據岱海岱及淮惟徐州鄭無注但青州旣言東自海西至岱則徐州亦必以爲西至岱孔傳以爲北至岱按二州雖同有海

岱之文而岱畎絲枲之文見於青州則山屬青州也爾雅齊曰營州注云自岱東至海此蓋殷制又濟河間曰兗州注云自河東至濟周禮河東曰兗州賈疏以爲侵禹貢青徐之地蓋以其山鎮爲岱澤藪曰大野知之殷之兗州自河東至濟與禹貢同其徐州自濟東至海亦與禹貢同而周則言河不言濟蓋其境越濟而東得岱矣岱爲青徐接界徐州曰大野旣豬是知侵禹貢青徐之地矣魯頌泰山巖巖魯邦所詹傳云詹至也疏云泰山在齊魯之界言所詹見其不全屬魯也禮器云齊人將有事於泰山必先有事於配林後漢書梁松等議云蓋諸侯之禮也河嶽視公侯王者祭焉宜無卽事之漸不祭配林盧植曰配林小山

麓配泰山者也風俗通云林樹木之所聚生也配林在泰山西南五六里

首陽

首陽疑在今蒲州府治爲是○寰宇記云遼州和順縣首陽山在縣東四十里按論語鄭康成注首陽山在河中蒲坂城南今陽區山俗號爲首陽山又蒲州河東縣首陽山卽雷首山阜也昔夷齊守節於首陽又伯夷墓在縣南三十里雷首山○釋地云史記正義首陽山凡五所王伯厚以爲在蒲坂者得之蓋爲讓國而餓則他處皆可爲讓伐而餓則石曼卿詩云恥生湯武干戈日寧死唐虞揖遜區是也○括地志曰蒲州河東縣雷首山一名中條山亦

名厯山亦名首陽山亦名蒲山亦名襄山亦名甘棗山亦名猪山亦名獨頭山亦名薄山亦名吳山此山西起雷首東至吳坂凡十一名隨州縣分之○宋氏翔鳳曰按史記伯夷列傳注馬融曰首陽山在河東蒲坂華山之北河曲之中正義曰曹大家注幽通賦云夷齊餓於首陽山在隴西首陽又戴延之西征記云洛陽東北首陽有夷齊祠今在偃師縣西北又孟子云避紂居北海之濱首陽山說文云首陽山在遼西按孟子北海之濱空語無實說文山部場山在遼西廣韻引說文同無首陽在遼西之文所可據者爲蒲坂洛陽隴西三處今統核數說論語餓於首陽之下斷在洛陽東北元和郡縣志河南府偃師縣首陽山在

縣西北二十五里盟津在縣西北三十里武王伐紂夷齊叩馬而諫正當在盟津後隱首陽亦當不甚遠又攷尸鄉爲湯都在今偃師縣西北二十五里首陽亦在尸鄉之西北蓋本尸鄉名西山也漢人多以偃師首陽爲夷齊所隱惟馬融注論語謂在蒲坂漢志河東蒲坂縣有堯山首山祠雷首在南則蒲坂之山乃是雷首非首陽也又在蒲坂南安得有西山之目顏師古謂在隴西者漢志隴西首陽縣禹貢鳥鼠同穴山在西南今甘肅蘭州府渭原縣東北有首陽故城東距河濟之間幾二千里蓋山名偶同不可牽合也王伯厚據會子言二子居河濟之間反以首陽在蒲坂爲得實案漢志河東郡垣縣禹貢王屋山在東北浼水

所出東南至武德入河此濟源也垣縣故城在今山西絳州垣曲縣西北二十里王屋山在今河南懷慶府濟源縣西八十里蒲坂故城在今山西蒲州府城東五里計王屋西至蒲坂四百餘里使以蒲坂首陽爲夷齊所隱則與河濟之間渺不相涉詩唐風采芣首陽之巔此亦指偃師首陽蓋偃師東七十餘里至今開封府汜水縣卽春秋時鄭虎牢地晉欲霸中國必先固結鄭心故設言登首陽以望鄭繼言首陽之下則自晉至鄭之所經也終言首陽之東正指鄭國在首陽之東矣○塗按宋說亦未足據曾子言夷齊死於溝澮之間猶言不忘溝壑耳又言二子居河濟之間謂其諫伐耳非必指其餓地也雷首山勢甚縣延豈

必自蒲坂言之而謂不當稱西山耶且以唐風之首陽而
謂指鄭之首陽其說亦近於鑿矣○盧龍縣志曰莊子云
伯夷叔齊西至岐陽見周武王伐殷曰吾聞古之士遭治
世不避其任遇亂世不爲苟存今天下聞周德衰其並乎
周以塗吾身也不若避之以潔吾行二子北至於首陽之
山遂饑餓而死又下詩登彼西山今渭源縣首陽山在岐
山西北明卽夷齊餓處也宋白北番地里志曰首陽山在
平州舊志言今府城東南十五里有峒山一作陽山卽其
地竊意二子當日之逃爲國人之將立已耳及中子旣爲
君則名分已定可以無嫌子臧之反於曹季札之反於吳
古之人有行之者二子何獨不然况西土之人皆爲讐國

箕子之去又適東夷天下宗周之時舍故都其何往孤竹遠在夷陬局初隔山戎而蔽於燕燕史無通於中國中國之首陽表著爲口實而海濱孤竹無從稱之矣是或一說也○塗按張守節言首陽有五余按寰宇記和順縣亦有首陽則首陽有六矣然孟子言北海之濱正指遼西地耳則首陽止有五矣今本說文暘字下無首陽字當係傳寫脫落據玉篇漢書王貢兩龔傳注所引皆有首字諸家各指一地未可懸斷姑並存之以備攷可也○一統志賁山在鞏縣北帝王世紀以爲卽東首陽山在偃師縣西北北接孟津縣界舊志卽邙山最高處○一統志叩馬村在孟津縣東三十里相傳夷齊叩馬諫武王處

東蒙

東蒙在今沂州府蒙陰縣○釋地云東蒙卽書之蒙羽其藝詩之奄有龜蒙也元和志誤析爲二以在沂州費縣西北八十里者爲蒙山在費縣西北七十五里者爲東蒙山按漢地理志蒙陰縣注云禹貢蒙山在西南有祠嶺史國在蒙山下可證其爲一山也○皇侃疏曰蒙山在東故曰東蒙主也○禹貢錐指曰蒙山在今蒙陰縣南四十里西南接費縣界劉芳徐州記蒙山高四十里長六十九里西北接新泰縣界齊乘曰龜山在今費縣西北七十里蒙山在龜山東二山連屬長八十里禹貢之蒙羽論語之東蒙正此蒙山也後人惑於東蒙之說遂誤以龜山當蒙山蒙

山爲東蒙山而隱沒龜山之本名故今定正之邑人公鼎論曰蒙山高峰數處俗以在東者爲東蒙中央者爲雲蒙在西者爲龜蒙其實一山龜山自在新泰其北有沃壤所謂龜陰之田亦非卽龜蒙峰也參之以邢疏東蒙卽蒙山非有二山明矣

南山

南山在今西安府附郭長安縣南○釋地云詩詠南山可指實者二一曹之南山郡縣志在曹州濟陰縣東二十里南山朝隤是也今在曹縣一終南之山如南山之壽幽幽南山節彼南山信彼南山是也今長安咸寧藍田藍屋四縣之境○樊氏廷校曰詩凡三南山采芨南山周南山也

南山崔崔齊南山也南山朝隴曹南山也在書禹貢詩秦風爲終南左傳爲中南地理今釋云終南山在今陝西西安府長安縣南五十里東至藍田縣西至鳳翔府郿縣縣亘八百餘里○元和郡縣志云終南山在京兆府萬年縣南五十里一名太一亦名中南○詩地理攷云張衡西京賦云終南太一隆崛崔嵬則非一山矣李善曰終南山之總名太一一山之別號○柳子曰惟終南據天之中在都之南西至於褒斜又西至於隴首以臨於戎東至於商顏又東至於太華以距於關○塗按左傳杜注在武功縣南地理志在武功縣東武功今之郿縣及武功縣境也

華

華山在今同州府華陰縣南十里○白虎通曰華之爲言
穫也言萬物成熟可收穫也○風俗通曰華者華也萬物
滋然變華於西方也○括地志曰華山在華陰縣南八里
古文以爲敦物也○塗按禹貢雍州終南惇物至於鳥鼠
鄭注云地理志終南惇物皆在右扶風武功也孔氏正義
云地理志云扶風武功縣有太一山古文以爲終南垂山
古文以爲惇物山在今武功縣東南二百里卽太一之北
峰括地志以爲華山誤矣○禹貢華陽黑水惟梁州孔氏
正義云周禮職方氏豫州其山鎮曰華山在豫州界內此
梁州之境東據華山之南不得其山故言陽此山之西雍
州境也○塗按梁在華陽雍在華陰而山屬於雍至周方

以爲豫州鎮也

嶽

嶽在今鳳翔府隴州西南○廣雅吳山謂之開山○白虎通嶽之言輟也輟功德也○地理志吳山在右扶風汧縣西古文以爲汧山雍州山也○廣雅疏證曰兩漢志并以汧山爲吳嶽胡渭曰周尊汧山曰嶽山谷又謂之吳山或謂之吳嶽史記又以嶽山與吳嶽爲二而汧山之名隱矣在周禮通謂之嶽山禹貢總謂之岍山谷以在州西四十里者爲汧山在州南八十里者爲嶽山其實一山也○邵氏晉涵曰周營成周宅於土中華山在成周境內故首舉之吳岳在岐周境內故次及之又曰冀州之霍山與泰華

衡恒唐虞之五嶽也華嶽泰恒衡周之五嶽也泰衡華恒
嵩高漢初相傳之五嶽也泰華霍恒嵩高武帝所定之五
嶽也○塗按霍山名大岳書至于岳陽鄭注太岳之南一
名霍太山此職方冀州之山鎮也職方雍州其山鎮曰嶽
山卽岍也禹貢導岍及岐鄭注云四列導岍爲陰列西傾
爲次陰列嶓冢爲次陽列岷山爲正陽列馬融注云三條
導岍爲北條西傾爲中條嶓冢爲南條

岐

岐下在今鳳翔府東五十里之岐山縣○顏師古曰其山
兩岐俗呼箭括嶺○括地志岐山一名天柱山○寰宇記
其峰高峻迥出諸山狀若天柱因以爲名○一統志眉城

廢縣在岐山縣東北水經注岐山水屈逕周城南城在岐山之陽而近西所謂居岐之陽也又歷周原下北則中水鄉成周聚故曰有周也○釋地云孟子言去邠踰梁山言山而不及水詩言率西水潄言水而不及山太史公合而作周本紀曰遂去邠渡漆沮踰梁山止於岐下將自邠抵岐東南二百五十餘里登山涉水敘次如畫然程大昌雍錄謂渭水實在梁山下之南循渭西上可以達岐則詩水字又與漆沮無涉益精確矣○施氏彥士曰邠州南界永壽縣縣南九十里爲乾州州北五里卽梁山其山橫而長自邠至此百三十里適界邠岐之間乾州西界鳳翔府扶風縣又西六十里爲岐山縣是岐在邠之西南而百詩云

自邠抵岐東南二百五十里誤矣且程大昌旣知循渭西上可以達岐而雍錄又云邠在岐西北亦誤蓋邠的在岐之東北也○又曰孟子外書云文王生於台疆台卽后稷所封邑在今乾州西南六十五里武功縣岐周在其西八十里故岐周亦曰台疆太王遷岐亦是復后稷之故地也○塗按詩疏引鄭志幽在岐山西北四百里幽譜但謂在岐山北詩疏屢言幽在岐西北則閻氏謂在西北固有所本也尙書大傳注謂在東北以今地理攷之則在東北爲是或者岐之西北岐之東北皆爲幽地歟

梁山

梁山在今乾州○釋地云雍州有二梁山一在今韓城邠

陽兩縣境書治梁及岐詩奕奕梁山春秋梁山崩爾雅梁山晉望也皆是孟子之梁山則在今乾州西北五里其山橫而長自邠抵岐二百五十餘里山適界乎一百二十里之間○尙書大傳云過梁山邑岐山鄭注云梁山在岐山東北岐山在梁山西南

轉附朝儻

轉附朝舞當爲山名在今登州府文登縣○趙注云皆山名又言朝水名也疏云顧野王釋云澠水名出南陽恐誤澠爲儻○釋地云二山不知所在宋趙德有轉附附作鮒屬萊州之說殊無依據竊意此二山當在海之東○樊氏廷枚曰程是菴曰景公傳轉附乃太公之墓朝儻乃桓公

之墓按太公反葬於周檀弓疏云葬錫陪文武魏王泰謂桓公墓在牛山牛山在臨淄縣南十里則非轉附朝儻也金仁山云朝儻海旁之山潮至如舞陳士元孟子雜記朝如朝夕之朝儻有朝歌齊有朝舞皆以俗好嬉遊故名其地諸說不同○宋氏翔鳳曰水經白水出朝陽縣西東流過其縣南又云澠水出澠陰縣西南澠陰漢書地理志作舞陰與朝陽皆屬南陽郡漢舞陰在今南陽府泌陽縣西北六十里朝陽在今鄧州南八十里則朝儻二水皆在南陽明甚案轉謂周流附謂薄附言周流朝儻之水而薄至楚之國都此齊桓伐楚之故道也管子戒篇桓公將東游問於管仲曰我游猶軸轉斛南至瑯琊景公思復修桓之

業故欲觀其舊蹟僖四年左傳君處北海寡人處南海此
避海而南亦泛指楚地非必浮舟海中也蓋朝舞尙在齊
西東行至瑯琊方是齊之南境故云南放琅邪也○焦氏
循曰按史記秦始皇二十八年並渤海以東過黃腫窮成
山登之罘立石頌秦德焉而去南登琅琊大樂之三十七
年自琅琊北至榮成山至之罘漢書郊祀志後五年東幸
琅琊禮曰成山登之罘浮大海司馬相如子虛賦云且齊
東階巨海南有琅琊觀乎成山射乎之罘晉灼云之罘山
在東萊縣蓋之罘卽轉附也之與轉一聲之轉罘與附
古音通秦皇漢武所游自琅琊而北則至之罘成山自之
罘成山而南則至琅琊齊景公欲觀乎轉附朝舞轉附卽

之罘也朝舞卽成山也于欽齊乘云召石山在文登之東
伏琛齊記云始皇造橋觀日海神爲之驅石豎柱今驗成
山東入海道水中有豎石往往相望似橋柱之狀又有柱
石二乍出乍沒又云召石山與成山相近因始皇會海神
故後世遂呼成山曰神山然則召石卽成山也朝召古字
通朝舞卽柱之緩聲蓋以石形似柱而緩呼之爲朝舞古
舞石聲近閩氏疑此二山當如成山召石山之類未以聲
音借求之故不能定耳或謂轉附朝舞卽華不注乃華不
注在今濟南歷城之西去齊都不遠無煩欲觀毛氏奇齡
謂轉附朝舞卽管子猶軸轉斛按傅子謂管子乃後之奸
事者所加刺取孟子之文入之是猶軸轉斛爲轉附朝舞

之譌不得謂轉附朝儻卽猶軸轉斛之譌也然卽其斛字益知儻爲石字韋昭國語注云石今之斛也

瑯邪

瑯邪在今青州府諸城縣○釋地云趙注齊東南境上邑集註因之今諸城縣東南一百二十里有琅琊山山下有城卽其處○諸城縣志曰此山三面環海惟西南通陸○括地志云密州諸城縣東南百七十里有琅琊臺越王勾踐觀臺也臺西北十里有琅邪故吳越春秋云越王勾踐二十五年徙都琅瑯立觀臺以望東海遂號令秦晉齊楚以尊輔周室歃血盟卽勾踐起臺處又曰瑯琊山在密州諸城縣東南百四十里始皇立層臺於山上謂之瑯邪臺

○水經注琅邪山孤立特顯出於衆山上下周二十餘里
傍濱巨海所作臺基三層層高三丈上級平敞方二百餘
步高五里臺上有神淵○山海經琅邪臺在渤海之間琅
琊之東注云今琅邪在海邊有山特起狀如高臺卽琅邪
臺也

崇山

崇山在今澧州永定縣○釋地云孔疏謂在衡嶺之南非
也通典澧州澧陽郡澧陽縣本漢零陽縣地有崇山卽放
驩兜之所宋則在慈利縣路史以爲今有驩兜墓是○周
氏柄中曰在今湖廣澧州永定縣大庸所東有驩兜塚寔
宇記以嶺外之驩州爲所放處非

羽山

羽山在今登州府蓬萊縣○蓬萊縣新志云羽山在縣東南三十里寰宇記云登州蓬萊縣東十五里卽殛鯀處有鯀城○王氏鳴盛曰馬融書注云東裔也禹貢蒙羽其藝卽此昭七年子產云昔堯殛鯀於羽山杜注在東海祝其縣西南漢地理志云東海郡祝其縣有羽山續漢志亦然劉昭注引博物記云縣東北獨居山西南有淵水卽羽泉也俗謂此山爲懲父山晉地理志亦云羽山在祝其縣之西今屬江南贛榆縣界縣南有祝其故城卽漢舊縣是也○地里攷實云羽山在沂州之東南海州之西北贛榆之西南郟城之東北實一山而跨四州縣也祝其城則在贛

榆○塗按祝其之羽山其地近較之崇山幽州三危不類故近儒皆以在蓬萊者爲是與孔傳言東裔在海中者合也○一統志在蓬萊縣東南三十里之罟水所出

三危

三危當在今西藏土司境○戴氏震曰鮮水西北白龍堆沙之東曰三危是山不協禹貢之文其名蓋後起也鮮水今之青海在沙磧之東而寧夏府之西肅州甘州之南積石之北元和郡縣志沙州燉煌縣三危山在縣南三十里有三峰故曰三危卽指此也考之書黑水西河惟雍州華陽黑水惟梁州導黑水至於三危入於南海河旣行積石之南東北屈曲過雍州之北折南左右冀雍之間爲龍門

西河而河所出山自枯爾坤西南接岡底斯西北爲于闐
南山直抵葱嶺則河北之水不得絕之而南以入南海今
所謂三危山者其下亦無水逕三危不在河北甚明屈原
天問篇云黑水元趾三危安在今河源西南三百餘里爲
金沙江之源又東南五百餘里爲潞江之源潞江自發源
卽成池三皆黝黑殆所謂元趾者歟三危蓋其所經之地
歲久名湮無從證實耳此水導源三池去沙江源不遠三
源歧置如鼎足皆在岡底斯東北然則雍之西南境至此
水上遊梁之西境至此水無可疑也左傳允姓之姦居於
瓜州瓜州漢敦煌也允姓所居在瓜州三苗所居在三危
後世失傳而一之也瓜州值析支西北三危蓋值崑崙東

歟○程氏同文曰爾雅謂河出崑崙山海經謂河與黑水同出崑崙是爲雍梁二州之黑水亦卽導水之黑水其雞山所出乃別一黑水水經注黑水出張掖雞山南流過三危入南海之說非也黑水旣由雍以入南海其不假道於梁無疑然則雍梁以黑水爲距皆西距耳三危所在當以康成引地記書在鳥鼠之西南當岷山者爲確蓋鳥鼠南少西爲岷山其曰鳥鼠西南當岷山者其地必更在岷山之西與岷山南北相當處其不直曰岷山西乃曰鳥鼠西南者當時達三危必由鳥鼠取道傍岷山北循黃河南岸經今四川松潘屬郭羅克土司境西南行乃抵焉岷山之西爲西藏土司境三危當在其處蓋枯爾坤之西爲巴薩

通拉木又西爲諾莫渾烏巴什雖隨地異名實同爲一山其卽古之崑崙乎黃河出其東格吉河出其南流爲瀾滄江喀喇烏蘇河出其西流爲怒江皆經雲南此二江必有一古之黑水矣孰爲近瀾滄爲近今金沙江之西乃瀾滄江也○張氏邦仲曰黑水之名見於禹貢者三出崑崙者此導水之黑水也水經注所謂黑水此雍州之黑水也唐樊倬以麗江爲黑水卽金沙江此梁州之黑水也蓋雍州之黑水其源在黃河之北梁州之黑水其源在黃河之南岷山脊東之水皆入江岷山脊南之水始入南海耳○塗按以黑水爲有三則三危亦有二地矣然按經序所導之水皆名見於上九州者也若置雍州梁州之黑水不釋而

別敘一所導之黑水經文豈有此體例乎當以禹貢三見之黑水爲一水者是也

箕山之陰

箕山之陰在河南府登封縣○劉熙注云箕山嵩高之北○釋地云張守節云箕山一名許由山在洛州陽城縣南十三里括地志遂云嵩山一名外方山在洛州陽城縣西北二十三里互相證明斷非一山也觀鄴道元注先敘太室山次五渡水並屬崇高縣又敘禹避商均於此及周公測日影處次箕山及上有許由冢並屬陽城縣雖同見潁水條內而山固區以別矣○一統志箕山在登封縣東南水經注陽城縣南對箕山山上有許由冢下有牽牛墟潁

水側有犢泉是巢父還牛處○宋氏翔鳳曰史記夏本紀益讓禹之子啓而避居箕山之陽集解曰陽字一作陰劉熙曰崇高之北正義曰箕山之陽卽陽城也箕字誤本是嵩字而字相似其陽城縣在嵩山南二十三里則爲嵩山之陽也按張守節言箕本字誤者熟思其文定當爲嵩高之南箕山之北也

牛山

牛山在今青州府臨淄縣○劉熙注云南小山曰牛山○釋地云齊之東南山也本趙氏注方向稍錯今日驗在今臨淄縣南十里亦在唐臨淄縣南二十一里○塗按牛山旣名南郊山齊又以此得名則詩咏南山崔崔應卽指此

○水經主天齊水出南郊山下謂之天齊淵五泉並出南北三百步廣十步水在齊入祠中齊之爲名起於此矣其水北流注於淄水○宋氏翔鳳曰南郊山卽牛山牛山爲齊臨觀之阜非過險峻樹木宗生斧斤易盡故爲小山韓詩外傳稱齊景公遊於牛山而北望齊曰美哉國乎鬱鬱泰山參天入雲視此小矣曰北望知山在齊南史記管晏列傳引括地志亦云管仲冢在青州臨淄縣南三十一里牛山之阿趙云東南非也

東山

東山當卽東蒙山○釋地云集註魯城東之高山案曲阜縣東二十里有防山孔子父母合葬處絕不高大也或云

費縣西北蒙山正居魯四境之東一名東山孔子登東山
指此